

Անատակ որդու վերադարձը

Կրտսեր որդի

Ես հոգնել էի, այնպես, ինչպես հոգնել եք կամ դեռ կհոգնեք դուք: Հոգնել էի եղբորիցս, որը հորս սիրո գերին էր, հորիցս, որն ինձ տվել էր ամեն ինչ (պատմուճան, մատանի, կոշիկներ, անասուններ...), բայց փոխարենը զրկել ազատությունից: Ես զբաղվում էի անասնապահությամբ, բայց սրտումս զգում էի, որ ավելիին եմ արժանի: Մտքումս սեպվել էր մանկական այն հիշողությունը, երբ դեռ 12 տարեկանում հայրս ինձ ուրիշ աշխարհ տարավ: Հորս սիրով շարված ու աշխարհից բանտող պատը ինձ գնալով ավելի էր նեղում: Ես ուրիշ աշխարհ էի ուզում, ես կյանք էի ուզում, հաճույքներ, որ հասու էին իմ հասակակիցներին, բայց ոչ ինձ. ես դժբախտ էի ծնվելուս պահից: Կոկորդիս էր տարիների մաղձը. ուզում էի փախչել տնից, հորիցս ու գտնել բախտ ազատության մեջ:

Հերթական՝ մյուս օրերից ոչնչով չտարբերվող մի օր, հայրս առաջարկեց ինձ ամուսնանալ **Եսթերի** հետ, մի աղջկա, որ մեր ընտանիքի բարեկամուհին էր: Մա չափազանց էր. ես չէի կարող դիմանալ, ինչպես չէր դիմանա նեղ հագուստը գեր մարդու մարմնին: Հորիցս պահանջեցի իր ունեցվածքից ինձ բաժին ընկնող մասը, որ թերևս միայն իր մահվանից հետո պիտի ինձ հասներ, բայց սպասելու ժամանակ չկար և ինչո՞ւ սպասել: Դա անարգանք էր հորս համար. նույնն էր, որ ասեի՝ ինչ տարբերություն, թե երբ կմեռնես, համարենք՝ մեռել ես, իմ բաժինը տո՛ւր: Հայրս ապտակելու փոխարեն զլուխն արագ թեքեց ինձանից ու դուրս եկավ: Մի ժամ չանցավ, երբ ծառաներն իմ հարստությունն ինձ ներկայացրին: Ես վաճառեցի ամենն ու գումարը ձեռքիս՝ գնացի այն աշխարհը, որի մասին էին բոլոր մտքերս:

Շատ էի ուզում ամեն ինչ ճիշտ անել, բայց սխալվեցի: Մի սխալին հաջորդում էր մյուսը. կրքեր, վայրկենական հաճույքներ, որոնք ինձ պիտի զրկեին հավիտենականից՝ երջանկությունից: Մի օր էլ արթնացա հասկանալով, որ այլևս գումար չունեմ: Ու կորան ամենքը, ընկերները կորան, որ մի ժամանակ սիրում էին ինձ. անատակ կնոջ պես, որ միայն գումարով է ունակ սիրելու (չնայած, որ հենց ես մնացի պատմության մեջ «անատակի» պիտակով): Անճարությունից դարձա խոզապան. անասուն պահելը միակ բանն էր, որ գիտեի: Մի օր խոզերի առաջ ջուր լցնելուց՝ ջրի մեջ իմ արտացոլանքը տեսա (մարդու դեմքին դաջվում է իր կյանքը. մեկ հայացքը հերիք է մարդուն ճանաչելու համար). իմ այլասերված աչքերում միայն մեկ բան կար՝ հիասթափություն: Ինձնից էի հիասթափվել. ես իրականում ավելի վատին էի արժանի: Ես կործանված մեկն էի՝ անթաղ մնացած մի մեռել, որը մեռավ սովից՝ ոչ թե ուտելիքի, այլ՝ կրքերի: Իմ հոգեհանգստին միայն ես էի հրավիրված. և՛ մեռելն էի ես, և՛ սգավորը, որը, սակայն, ունակ չէր անգամ արտասովելու. դա բարի մարդկանց հատկանիշն է: Կայնքը կորցնելուց հետո ես էլ ոչինչ չունեի կորցնելու. որոշեցի տուն վերադառնալ: Տնից հեռանալուց երբեք հետ չնայեցի. վերադարձին էլ չէի նայում: Տան ճանապարհին հայրս ընդառաջ վազեց, ես նրա ոտքերն ընկա՝ ներում հայցելու, իսկ նա ձևացրեց, թե ամեն օրվա պես անասուններին արածեցնելուց եմ վերադարձել: Ու հասկացա, որ ավել բանի կարիքը չունեմ, որ ունեմ ամենաթանկն աշխարհում՝ ընտանիքը, որտեղ միշտ սպասում են, որտեղ սիրում են՝ անկախ քո՝ դրան արժանի լինելու չափից: Ես առաջ ունեի ավելին, քան հիմա, բայց այդ պահին ունեցածս ինձ ավելի թանկ թվաց, քան երբևէ:

Ես մեկն եմ, ով ծառայից դարձավ որդի:

Հայր

Ես երջանիկ մարդ էի ինձ համարում, այնպես, ինչպես բոլոր նրանք, ովքեր դեռ չեն հանդիպել դժվարության: Ամեն ինչ ընթանում էր երջանկությանը համապատասխան, երբ մի

օր կրտսեր որդիս ապտակեց ինձ լոկ մի արտահայտությամբ. իր հասանելիք ժառանգությունն էր ուզում: Աչքերս դողացին արցունքոտվելու չափ, արագ գլուխս թեքեցի ու դուրս եկա: Դուրս եկա, որ նա չտեսներ արցունքներն իմ, դուրս եկա, որ չզգար թափն իմ ձեռքի... Երկար մտածում էի՝ ի՞նչ անել: Արգելելը սխալ էր (տարիներ առաջ իմ հայրն ինձ թույլ էր տվել հեռանալ)՝ ես իրավունք չունեի նրան արգելելու: Ուղարկեցի իր հասանելիք հարստությունն ու հայրական կարոտով նայեցի նրա ճանապարհին, մինչ հորիզոնում կորչելը. վստահ էի, որ չի շրջվի: Այդ օրվանից հետո երբեք դուռը չփակեցի, ոչ մի վայրկյան. վստահ էի՝ հետ է գալու: Ես գիտեի, որ կյանքում կան ճշմարտություններ, որոնք պետք է և կարելի է հասկանալ միայն սեփական փորձով: Եվ բնական է երբեմն սայթաքելը, կարևորը՝ կանգնելու համար անհրաժեշտ ուժ գտնելն է: Իմ որդին էր. պիտի վերադառնար: Ամեն օր նայում էի տուն բերող ճանապարհին՝ հուսով, թե քամիները, որ միայն փոշի էին բերում, մի օր էլ որդուս տուն կբերեն: Երեկոները ճաշում էի ավագ որդուս հետ. վախենում էի նրան էլ կորցնելուց:

Մի օր էլ հայացքս անհունին հառած՝ աղոթում էի Հորը՝ որպես որդի, աղոթում էի, որ վերադարձնի որդուս, որ ես նրան լինեմ հայր, նա ինձ՝ որդի: Աղոթքն ավարտելուն պես բացեցի աչքերս ու հեռվում նկատելով որդուս՝ վազեցի ընդառաջ. իմ կորած որդին գտնվեց, իմ մեռած որդին հարություն առավ: Անճանաչելի էր դարձել, ներողություն էր խնդրում չարություն արած երեխայի պես, ես էլ ինչպես միշտ ներեցի նրան. նա հաղթեց իրեն ու վերադարձավ: Պատվիրեցի խնջույք կազմակերպել: Երեկո էր, երբ ասացին, թե ավագ որդիս եկել է դաշտից, բայց չի ուզում տուն մտնել: Անհանգիստ դուրս եկա: Անձրև խոստացող երկնքի պես խիստ էր հայացքը նրա և լի բարկությամբ: Բռտեր չկային, հայացքն էր խոսուն. մեղադրում էր ինձ իրեն նույնքան չսիրելու մեջ (բայց մի թե՛ մարդն իր մի աչքը սիրում է մյուսից ավելի): Ես սիրում էի նրանց՝ առանց խտրականության և առանց պատճառի, սիրում էի, որովհետև իմ որդիներն էին:

«Մեռած եղբորը ոչ թե պետք է սպանել արհամարհանքով, այլ կենդանացնել՝ սիրով», - ասացի ու գրկեցի նրան, ինչպես տարիներ առաջ, երբ նա չարություն էր անում:

Ես մեկն եմ, ով ունեցավ երկու որդի, կորցրեց երկուսին էլ, բայց վերջում գտավ:

Ավագ Որդի

Ես այս պատմության մեջ, ինչպես և իրական կյանքում, մնացի անկարևոր, երկրորդական կերպար, որի ներկայությունը միայն պատմության ճշմարտացիությունը փաստելու նպատակ ունի: Ես դեռ փոքրուց անում էի ամեն ինչ հորս սիրուն արժանանալու համար, բայց անօգուտ. նա կրտսեր եղբորս ավելի էր սիրում: Իմ մանկական հուշերում դաջված է առաջին հիասթափությունը, երբ հայրս օտար աշխարհ գնալուց իմ փոխարեն կրտսեր եղբորս իր հետ տարավ: Կարծո՞ւմ եք՝ ես չէի ուզում գնալ: Ես չափահաս էի ու արդեն հմուտ հողագործ: Մտածում էի՝ օտար աշխարհում սիրուն աղջիկներ կլինեն, գեղեցիկ տներ... գուցե և կան, ինչ իմանամ. եղպես էլ երբեք չգնացի:

Իմ աշխարհը մեր այգին էր: Իմ աշխարհն այնքան փոքր էր, որ սահմանափակվում էր էր չորս ցանկապատի արանքում և որի մեջ հազիվ 300 եզ ու գուցե նաև ես կտեղավորվեինք (ի՞նչ իմանամ, հնարավոր է՝ թիվը ճիշտ չեմ ասում. երբեք անասուն չեմ պահել): Ես էլ էի հոգնել, այնպես, ինչպես հոգնել էր եղբայրս, ես էլ էի ուզում փախչել, միայն թե, ի տարբերություն նրա, ես փախչելու հիմք չունեի. ես հորս շատ էի սիրում: Երբ նա գնաց, ես հուսով էի, թե հայրս ինձ կսկսի կրկնակի սիրել, բայց՝ ապարդյուն: Նա ամեն օր նայում էր եղբորս ճանապարհին, այնպես, ինչպես նրա գնալու օրը: Ես ինձ ծառա էի զգում, ոչինչ ավելի. հայրս ամեն օրվա աշխատանքիս դիմաց վճարում էր ինձ՝ մեկ միասին անցկացրած ընթրիքով: Ես վստահ էի, որ հորս մյուս որդին չի վերադառնա: Վերադառնար էլ՝ Կայենի նման կսպանեի նրան:

Վերադարձավ: Չայրույթս եռակի էր. նա վերադարձել էր և հակառակ իմ սպասումներին՝ կենդանի, հայրս նրան ընդունել էր՝ պատժելու փոխարեն, մորթել էր իմ եզը՝ այն եզը, որն իմ ժառանգության մասն էր: Իր ժառանգությունը վատնել, վերադարձել էր իմը վատնելու: Ոչինչ չասացի հորս. մեկ է՝ չէր հասկանա: «Մեռած եղբորը ոչ թե պետք է սպանել արհամարհանքով, այլ կենդանացնել՝ սիրով», - ասաց՝ պետք է՝ հրամայելու պես, ես էլ, ինչպես միշտ, արեցի նրա ասածը՝ մի փոքր ավելի սիրո արժանանալու ակնկալիքով և դրա չիրականանալու իրատեսությամբ:

Ես մեկն եմ, ով որդուց դարձավ ծառա:

Հեղինակ՝ Հովհաննես սրկ. Ավետիսյան